

**UiTM tetap hak Melayu, Bumiputera, kata Naib Canselor
Malaysian Insider
Sept 12 , 2013
OLEH MOHD FARHAN DARWIS**

Naib Canselor Universiti Teknologi MARA Malaysia (UiTM) Tan Sri Prof Dr Sahol Hamid Abu Bakar menegaskan universiti khusus untuk golongan Melayu dan Bumiputera itu akan tetap dipertahankan daripada dibuka kepada bangsa lain.

Perjuangan UiTM jelas Sahol Hamid adalah untuk meningkatkan jumlah golongan profesional dan separa profesional dalam kalangan masyarakat Melayu serta Bumiputera akan diteruskan selaras peruntukan undang-undang sedia ada.

"Kemerdekaan negara kita dan perjuangan UiTM untuk meramaikan golongan profesional dan separa profesional akan terus diperjuangkan selaras dengan peruntukan dalam Perlembagaan Persekutuan.

"Bila kita bercerita soal kemerdekaan, perkara itu sinonim dengan perjuangan orang Melayu untuk menjadi bangsa yang disegani di negara ini. Oleh itu kita akan terus mempertahankan institusi UiTM sebagai IPTA untuk orang Melayu dan Bumiputera," katanya dipetik akhbar Utusan Malaysia hari ini.

Awal minggu lalu, pembantu kepada Penasihat DAP Lim Kit Siang, Dyana Sofya Mohd Daud mencadangkan agar diwujudkan institusi sama seperti UiTM dan terbuka kepada semua rakyat Malaysia tanpa mengira bangsa.

Graduan Fakulti Undang-Undang UiTM itu menegaskan beliau kesal melihat sebahagian rakan bukan Melayunya dinafikan peluang melanjutkan pelajaran ke IPTA.

Sistem pendidikan Malaysia jelasnya perlu bergerak melangkaui garis perkauman dan dipacu berasaskan keperluan.

Sahol Hamid bagaimanapun berkata, orang Melayu juga perlu mempertahankan peranan bahasa Melayu sebagai bahasa kebangsaan walaupun ada pihak yang cuba mempertikaikan peranan tersebut.

"Bahasa Melayu telah diiktiraf sebagai bahasa kebangsaan sejak negara mencapai kemerdekaan sebagai rakyat Malaysia tidak mengira apa bangsa perlu memperjuangkan penggunaan bahasa tersebut dalam sistem pendidikan di negara ini," katanya.

Ekoran kenyataan yang dikeluarkannya, Dyana menerima kecaman keras beberapa pemimpin politik dan juga badan bukan kerajaan serta menyelar setiausaha politik Kit Siang itu sebagai "Melayu yang tidak kenal sejarah dan menjadi mangsa diperalat DAP."

Pengerusi Umno Selangor Datuk Seri Noh Omar menasihati Dyana agar seharusnya memahami falsafah penubuhan UiTM yang diasaskan oleh Majlis Amanah Rakyat (Mara) sambil menggesa gadis itu menelusuri sejarah penubuhan DAP yang diasaskan oleh PAP di Singapura.

Datuk Saifuddin Abdullah turut senada dengan Noh sambil menjelaskan objektif penubuhan UiTM bagi membantu pelajar Bumiputera khususnya dari luar bandar.

Beliau berkata, keistimewaan UiTM tidak perlu dipertikaikan kerana masih ada 19 IPTA yang terbuka kepada semua kaum dan tidak dihadkan kuota kemasukannya.

Pertubuhan Pribumi Perkasa Kebangsaan (Perkasa) menyifatkan Dyana sebagai budak muda yang masih mentah.

Setiausaha Agung Perkasa, Syed Hasan Syed Ali, berkata tanpa polisi UiTM yang mengangkat martabat orang Melayu, maka pastinya Dyana tidak akan bergraduasi di sana.

“Langkah mayat kami dulu. Falsafah pendidikan UiTM yang mengutamakan orang Melayu menjadikan dia berjaya hingga ke hari ini,” katanya kepada The Malaysian Insider. - 12 September, 2013.

Hakcipta © 2013 The Malaysian Insider

Source:

<http://www.themalaysianinsider.com/bahasa/article/uitm-tetap-hak-melayu-bumiputera-kata-naib-canselor-uitm>